


PAMFLET  
651



**T**  
**m**



V/ 539.

DISCOVRS.  
**V**erclaerende wat for-  
me ende maniere van regieringhe / dat die  
Nederlanden / voor die alderbeste  
ende zekerste / tot desen  
tyden aenstellen  
mochten.

1. Corint. 7.

Sijt ghy tot dienstbaerheyt gheroepen/ becom-  
mert v niet/ maer so ghy vyz werden  
condt/ ghebruyct dat lieuer.



T. Liuius.

Als Brutus die Tyrannē/namelijck die Tarquinius  
wt Rome verdreef/ so sprack hy/ wy moeten  
van twee dinghen dat eene verkielen: Een eer-  
lijck leuen in vyzheyt/ ofte voor onse vyzheyt  
een mannelijcke doot.

Anno/ M. D. LXXXIII.

657  
22

DEEL 3

DEEL 3

DEEL 3

DEEL 3

DEEL 3

DEEL 3



## DISCOVERS.

**Verclaerende wat forme ende maniere**  
van regieringhe/ dat die Nederlanden / vooz  
die alderbeste ende zekerste / tot desen  
tyden aenstellen mochten.

( \* \* \* )



**A**LE die inder heyligher  
Schrift / ende in den gheloofweerdighen  
Historien een weynich belesen en  
eruaren zijn / die wetē ghenoechsaem /  
hoe die menschē vanden beghinne der  
Weerelt / en ooc nae de Sunde-vloet /  
in aller bypheypt / by elckanderen ghe-  
leeft ende ghewoont hebben / in ghe-  
lijcker aucthoriteyt / macht ende aensien / tot der tijt toe /  
dat sy om eerbaerheyt / deught ende gherechticheyt te be-  
ter te onderhouden / sonninghe onder hen / bypwillich tot  
Querheyden ende Regenten vercozen hebben. Daer wt  
datmen merckē can / dat die menschē / niet om die Quer-  
heyden van Godt ghelchappen zijn / maer dat die Quer-  
heyden / om der menschen dienst ende welbaert / door het  
ingheuen Godes verordonneert ende inghestelt zijn / op  
dat sy souden wesen / een leuende ende sprekende Wet /  
om die Wetten ende Ordonnantien te onderhouden / die  
sy (welcke hen in een Stadt ofte andere plaetse begauen ende  
voeghden om tsamen te woonen) onder een anderen byp-  
willich vooz goet aenghesien ende besloten hadden.

Maer Godt die vanden aenbeghinne zijn Kercke ghe-  
hadt / ende in die Arcke Noach / die selue ghespaert ende  
bewaert heeft / heeft van stonden aen / der seluer zijnder  
Kercken / heylighe Wetten ende brome Mannē gheghe-  
uen / die de ongherechticheyt ghestraffet / en die gherech-

A ij.      ticheyt



ticheyt voorszestaen hebben / so dat eerste boeck Moyses  
claerlijck betupght. Doch die regeringhe / die Godt  
bande beghinne / onder zijn volck inghestelt heeft / was  
veel ghelijckformigher der regeringhe eenes Vaders / ouer  
synen kinderen ende huyfghelin / dan eender heerschap-  
ppe / eenes gheweldighen Heere / ouer zijn aarme onder-  
danen / so die regeringhe / Abrahams / Moyses / Josua en  
dierghelijcken betupght / in de welcke gheen tyranie noch  
moetwillighe heerschapppe / ghebonden noch ghemerckt  
werdt. Ende voorszwaer / noyt en was den staet ende die  
conditie van Godes volck beter / dan ten tyden van dese  
Vaderlijke regeringhe / die Godt / als die alder bequaem-  
ste / banden beghinne selue verozdonneert heeft.

Hose. 13.

Job 34.

Het waere oock Godt bouen maten lief gheweest / dat  
synen kinderen by dese forme ende maniere der Vader-  
lijke regeringhe ghebleuen waren / maer ondancbaer  
ende moetwillich werdende / hebben sy dese regeringhe  
verwozpe / daerom hen Godt tot een straffe / in synen toorne  
(soo Hoseas spreekt) eenen Conijnck ghegheuen / en om  
zijn volck te dwijnghen / soo Job oock zept / liet hy eenen  
huyfghelaer ofte Hypocrijt regieren. Ende also heeft hy  
die verwerpinghe / van dese voorszreue Vaderlijke en  
vriendelijke regeringhe / zwaerlijck / ende niet alleyn  
mit woorden / maer oock mit onghewoonelijckē donder /  
ontweder ende schadelijcken reghen ghestraffet / soomen  
int eerste boec Samuelis aen dat 12. Capittel lesen mach.

De wyle dat dan den volcke Godes / soo veel aen die  
forme ende maniere der regeringhe ghelegghen is / ende  
dat nu ons gheliefde Vaderlandt / schier staet sonder ze-  
ker ende bestendighe forme van regeringhe / dat Spaen-  
sche tyranisch regiment / om hooghwichighe wel ghe-  
gronde oorzacken verwozpe hebbende / ende hen nu dooz  
die verraderische moordadicheyt der Fransose / so schen-  
delijck bedroghen bindt / ende is eenen mensche ghelijck  
die op eenen crupswech ofte straete hem bindende / niet en  
weet



weet welcken wech dat hy best verkieſen ende ingaen ſal/  
om te gheraken daer hy gheerne waere/ ſo hoepe ic/ dat  
die goethertighe Liefhebbers des Vaderlandts/ my dat  
int beſte afnemen ſullen/ dat ick hen hier in/ om tot een  
bequame forme/ van een beſtendighe regieringhe te com-  
men/ mijn eenboudich bedencken voorſtelle/ de wyle sy  
in haere bypheyt blyuen/ om ſulck een forme van regie-  
ringhe in te ſtellen ende aen te richten/ als sy totter bewae-  
ringhe der eeren Godts/ en haerer welbaert/ bequaemſt  
ende dienſtelicks houden ende bekennen ſullen.

Die Hiſtorien betuyghen/ datter van dýperley formen  
van regieringhen/ altyt eene is ghehouden gheweest/  
daer nae dat die Landen ende volckeren zijn gheregiert  
gheweest. Want sy zijn gheweest/ ofte onder een Mo-  
narchia, dat is/ onder die regieringhe vā een eenich Hooft/  
het welcke in volcommen aucthoriteyt ende macht/ouer  
die onderdanen gheregiert heeft: ofte sy zijn gheweest  
onder een Aristocratia, dat is/ onder die regieringhe des  
waren Edeldoms/ welcke eensdeels dooz die byome ſep-  
ten harer ouderen/ anderſdeels dooz haer eyghen cloeck  
voorſtaen des Vaderlandts/ en der gherechticheyt/ ghea-  
delt ende verhooght geweest zijn: ofte onder een Demo-  
cratia, dat is/ onder een regieringhe der eerlickſten ende  
verſtandichſten Borgheren/ die vanden anderē wicbor-  
gheren/ mit zeker Wetten ende conditien/ oock voor ee-  
nen zekerē tijt/ ouer hen vercozen en gheſtelt zijn ghe-  
weest. Want daer gheen van deſen dýpen formen is/  
daer is een Anarchia ende een ſchadelijcke confuſie/ daer  
voor alle redelijcke menſchen hem behoordē te ſchrōmen.

Sommighe Philoſophen ende gheleerden/ hebbē die  
Monarchiam, dat is/ die regieringhe van een eenigh  
Hooft/ voor die beſte ende beſtendichſte ghepreſen/ ouer-  
midts dat een Hooft ende perſoon beter om onderhoude  
ende om verſaden is/ dan vele/ ghelijc der Apologus van  
den voghelen leert/ de welcke/ bouen ende tot dē Arent/  
A iij. noch



noch meer Coninghen verkielen wouden/het welcke hen  
om die boorsepde oorlaecke wederraeden wiert. Item  
men seyt oock/ dat die Monarchie/ der Goddelijcke re-  
gieringhe aller ghelijckformichst is/ wāt hy neffens hem/  
gheenen anderen dulden noch lyden can. Ghelijc Alex-  
ander Magnus boortypden sepde / dat eene Weerelt en  
conde gheen twee Alexandros draghen / ende Iulius Caesar  
sprack oock/ dat ghelijck den Hemel gheē twee Zonnen  
draghen can / also conde ooc dat Roomsche Rijke gheē  
twee Casares draghen. Maer veel andere verstandighe  
Mannen / merckende hoe lichtelijc/ dat het oordeel/ wil-  
le ofte verstandt eenes menschen konde verandert / be-  
weeght / ghecorrompeert ende bedroghen werden / oock  
hoe lichtelijc dat die Monarchie in een tyrannie degene-  
reert ende verkeert werdt / hebben die Aristocratiā, dat  
is/ de regeringhe des Edeldoms als die beste en besten-  
dichste vercozen ende gheprezen / also die noch tot Vene-  
gien/ ende in meer andere steden van Italien ghehouden  
ende ghebruyckt werdt. Andere hebben wt veel wich-  
tiger ende wel ghegronde oorlaeckē/ voor die bequaem-  
ste / sekerste ende lydelijckste forme van regeringhe / die  
Democratiā, dat is / dat Borgherlijck wel aenghestelde  
regiment/ ghehouden en ghelooft/ ouermidts dat sy ghe-  
achtet hebben / dat in een sulcke regeringhe / die tyran-  
nie alderminst te vreesen en te besorgen is/ ende dat die  
vrijheden der steden ende ghemeynen/ daer door ten be-  
sten ende sekersten onderhouden ende bewaert worden.  
Ende voorwaer die Historien betuyghē/ dat die beroem-  
de Stadt van Athenen/ in rijckdom/ neeringhen/ hantie-  
ringhen/ allerley goede constē ende scientien/ noyt voor-  
spoedigher gheweest ende meer gheslozeert heeft / dā ten  
tyden/ doe die boorsepde wel aenghestelde Borgherlijcke  
regeringhe/ daer is ghebruyckt ende onderhouden ghe-  
weest. Hierom werdt oock Thrasylus hooghelijck  
gheprezen/ de welcke soo Xenophon schrijft/ die boorsepde  
Stadt Athenen/ zijn Vaderlandt/ vā 30. Tyrannē (welc-  
ke de beste Borghers berooft ende veriaecht/en die vry-  
heyt



hept der Stadt onderdrückt hadde) verlost / ende die ver-  
iaechde Borghers/wederom in haer goet / ende die Stadt  
tot haere oude Borgherlijke byphept en regiment ghe-  
bracht heeft.

Ende soo wy sonder passie/de waerhept recht beken-  
nen willen / moeten wy niet belpden/datter tot deser tijt  
in Europa gheen ghelucksaligher volck en leeft / dan die  
Zwitsers / daer dese Democratia , dat is/ die eerlijke wel  
aenghestelde Borgerlijke regeringhe onderhoudē wert?  
Die Godtsalichept/ eerbaerhept/ en gherechtichept wert  
by hen/ in grooten brede onderhouden/dies soo ghebene-  
dijste Godt oock / also dat sy isamen vereenicht blyuen-  
de van allen Potentaten ghebreest werden/ welke haere  
alliancie ende vriendschap soecken. Daerom waere het  
nu oock wel noodich / dat wy in dese Landen/ die vooz-  
sepde forme van regeringhe wel rypelijck ouerdachten/  
om wt die Aristocratissche ende Democratissche/ dat is/  
wt die regeringhe der Edelen ende der Borgheren/eene  
ghemiatichde en goede forme van regeringhe te nemen/  
ende aen te stellen/ daer door ons Vaderlandt / van alle  
tyrannie bebydet/ en in Godtsalichept/ brede en gherech-  
tichept/ naemaels mochte gheregiert en behoudē werden.

Het is wel waer / dat alle die voozsepde dype vormen  
van regeringhen / in haer seluen goet/ ende Gode beha-  
ghelijck zijn / ende dat Godt zijnder Kerckē / so wel on-  
der die eene/ als onder die ander regeringhe/ veel goets  
ghedaē ende bewesen heeft: nochtans betuyght die heyl-  
ighe Schrift / ghelijck oock die Heydensche Roomsche  
Histoziē doen/ dat die Monarchie/ dat is/ die regierin-  
ghe eenes eenighen Hoofs/ lichtelijck in een tyrannie ver-  
keert is gheweest. Sien wy niet/ hoe dat Saul die eer-  
ste Conijnck ofte Monarcha, ouer Godes volck/ van ston-  
den aen een Tyrant gheworden is/ als hy den achterclap-  
pers/ verraders ende pluymstrijckers ghehoor ghegheuen/  
ende den bromen David om zijn weldoen/ vervolght/ en  
die



die Priesters des Heere sonder oorsaecke vermoort heeft?  
David een man wesende nae Gods herte/ een Conijnck  
ende Monarcha zijnde/ heeft hy zijn aucthoriteyt en mach-  
niet menichmael misbruyckt? Leest dat 9. cap. inden 2.  
boeck Samuelis/ daer vint ghy hoe hy Miphiboseth, den  
zone van Ionatha synen seer ghetrouwen vriendt/ die ac-  
keren synes grootvaders Sauls gheschenct heeft. Maer  
heeft David daerna/ op het valsche aenbringhen vā Siba,  
eenen knecht ende dienaar/ sonder Miphiboseth eenmael  
te beroepen ende te hoozen/ hem de voorszeyde goederen  
niet wederom ghenomen/ ende den Siba die ghegheuen/  
soo 2. Samu. int 16. cap. gheschreuen staet? So nu de-  
se H. Man Godes/ inder Monarchie/ dat is/ alleyn in  
volcommen macht regierende/ hem so vergrepen/ en den  
vromen Miphiboseth, mit onwaerheyt beschuldicht zyn-  
de/ onghelooft/ ghestraffet/ ende onderdrukt heeft/ wat  
comnen wy van anderen verwachtē/ die of Godt niet en  
kennen noch vreesen/ ofte ten minsten/ den hondertsten  
deel van Davids Godtsalicheyt ende vromicheyt niet  
en hebben?

Hoe claghelijck dat het mit der Kerckē Godes onder  
die Monarchie/ nae Davids afsteruen/ gheganghē sy/  
ende hoe cleyn dat het ghetal der vromen Monarchen  
en Coninghen gheweest sy/ die in Juda en Israel Gods-  
salichlijck gheregiert hebbē/ betuyghet de H. Schrift wel/  
ende wt dat eenich woort van Roboā Salomons sone/  
blijckt tselue ghenoechlaem/ de welcke tot synen onder-  
danen sprack/ so 1. Coningh. 12. cap. staet. Mijn Vader  
heeft v mit roeden gheslaghen/ maer ick sal v mit Schoor-  
pioenen slaen.

Wengaende de vier Monarchien der Chaldeen en Assy-  
riens/ der Perssen ende Meden/ der Grieken ende leste-  
lijck der Romeynen/ wat heeft de Kercke Godes/ daer  
onder moeten lyden? Hoe veel Tyrannen hebbē ten ty-  
den deser Monarchien ghewoedet ende gheraect? Hoe  
cleyn



clepne/ is dat ghetal der Godtsaligher Monarchen ghe-  
 weest? So Nimroth die eerste was/ wesende wt het ver-  
 bloeckte gheslachte vā Cham/ so warē vast alle die nae-  
 commers namelijk grouwelijcke Tyrannen. Ende oft  
 schoon Godts volck in die Monarchie der Perlen ende  
 Meden/ eenen Cyrum, item Darium den tweeden/ ende  
 Artaxerxen ghehadht heeft/ die wat milder ende lydelijcker  
 gheweest zijn/ dan die andere: Wie isser dā noch onder  
 desen gheweest/ die Godt recht ghekent ende ghedient  
 heeft? die op den beloofden Messiam, sijn ghelooue ende  
 vertroutwē ghestelt heeft? die de Afgoderye wtgheroept/  
 ende de Justitie recht gheadministreert heeft?

Aengaende die Roomsche Monarchie (want vande  
 Griekische die seer onlanck gheduerde/ is niet veel byson-  
 ders alhier te schryuen) heeft die niet in Iulio Casare, mit  
 onderdruckinghe vander bypheyt zijns Vaderlands aen-  
 ghevanghen? Is die oock niet met tyrannie ende moost  
 onderhouden en ghecontinueert gheweest? Ende de wy-  
 le dat altijt nae eenen boosen keiser/ noch een argher ghe-  
 succedeert heeft/ so heeft het die oude Romeynsche Drau-  
 we recht booz ghehadht/ die Iupiter om dat lanck leuē van  
 den wreeden Tyrant Nero ghebeden heeft/ op datter niet  
 een ander succedeerde en naebolghde/ die noch wreeder  
 en booser waere. Het is wel waer/ dat Godt sich ouer  
 syne arme Christenheyt ontfermende/ eyndelijc dē Godt-  
 salighē Constantinum Magnum, ontrent het Jaer 315, ver-  
 weckt heeft/ welke ouerwonnen hebbende/ die Tyran-  
 nen Maxentium ende Licinium, die Kercke Godes wat  
 gheboordert heeft/ ghelijck ooc nae hem Constantius, Va-  
 lentinianus, Gratianus, Theodosius, Arcadius ende Honorius  
 ghedaen hebben/ maer hoe clepne is dat ghetal der bro-  
 men Monarchen ende keiserē gheweest/ onder die 178.  
 Roomsche keiseren/ die duylanghe gheregiert hebben?  
 Wat heeft de Kercke Godes onder dese Monarchie moe-  
 ten lyden? Het is ooc openbaer dat die Republicque vā  
 Rome/ soo langhe die Aristocratie vermenghelt mit die

23      Demo-



Democratie/ dat is/ die ordentlijcke/ Adelijcke en Boz-  
gherlijcke regeringhe ghedueret heeft / in allen dinghen  
voorspoedich gheweest ende toeghenomen heeft/ maer so  
haest die Monarchie inghedronghen/ ende mit gheweldt  
ingheboert wierdt/ so heeft die Republicque afghenomen/  
so alle Historien dat eendrachtelijck betuyghen.

Die Aristocratie ofte regeringhe des Edeldoms allep-  
ne aengaende/ het is openbaer/ dat Solon ende Lycurgus,  
seer wylse ende gheleerde Mannen / dese forme vā regie-  
ringhe/ als die alder bequaemste/ by die van Lacedemo-  
nien ingheboert hebben. Demosthenes ende Cicero, heb-  
ben dese forme bouen alle andere regeringhe gheprezen/  
want die rechte/ waere en mit der daet oude Edel-man-  
nen/ wesende rechte Liefhebbers ende beschermers van-  
der bypheit des Vaderlands/ hebbē eerlijcke seften ghe-  
daen/ so bouen vandē byomen Thrasylulo gheseyt is/ en  
soo die Historien van Lucio Iunio Bruto, die Tarquinius  
Superbum (welcke Lucretiam veracht hadde) omghebracht  
heeft. Item van Dion tot Syracuse, van Vlyse, Themisto-  
cle, Marco Lepido, van Scipione Affricano, Cassio, en meer  
derghelijcke rechten Edelen Helden betuyghen: Maer  
het is te beclaghē / dat het ghetal sulcker Edel-luyden  
ende Liefhebbers des Vaderlants / ende spner bypheidē/  
so cleyn gheworden is/ ende dat sy / die een sulc dapper  
generous herte hebben / door ander vernemende Edelen/  
in haer goet boornemen ghehindert werden/ dat oock so  
weynich ionghe edel kinderen / also opghetoghen wer-  
den/ dat sy om landt ende lieden te regieren/ bequaem be-  
vonden werden/ so die experientie (welck Godt moet ghe-  
claeght zijn) meer dan ghenoech daghelijck betuyghet.  
Want wat hebben sy in desen elendighen staet des Va-  
derlants/ den seluen te goede/ in dese leste 25. Jaren doch  
wtgheericht? Het is oock wt sommighe exempelen/ noch  
op den dach van hedent openbaer / dat die Aristocratie/  
ende regeringhe des Edeldoms allepne / niet sonder ty-  
rannie ende onderdruckinghe der Bozgheren toegaet/  
daer



daer van niet noodich is breeder te discoureren.

Of nu wel gheen forme van regeringhe/ ter weerelt  
zijn can/ ofte sy en heeft haer beswaeringhen/ ende can  
oock misbruyct werde/ so is doch openbaer/ datter gheē  
bequamer noch bestendigher forme van regeringhe in  
desen letsten boosen tyden/ can bedacht noch aenghestelt  
werden/ dan die Aristocratie vermenghelt/ mit der De-  
mocratie/ dat is/ die regeringhe der besten Edel-lieden  
ende der verstandichste Borgherē/ in de welke die ghe-  
schickste ende bequaemste inwoonders ende Borghers/  
mit ghewissen conditien/ ende vooz eenen tijt/ totter re-  
gieringhe vanden haren mitborgheren vercozen werden/  
de welke haren vercozenen Querheeren/ bywillich ghe-  
hoorlaem ende ghetrouwē zijn/ behoudende die macht en  
bypheyt/ om die ghene die int regiment onbequame ghe-  
bonden werden/ oft hem in die regeringhe anders dra-  
ghen/ dan het behoort/ wederom af te stellen/ ende daer  
in nae het behooren te voozlien.

Ende sulcke regeringhe hebbē de Zwitfers/ dat iock  
der Tyrannen verwoypt hebbende/ louelijck aenghestelt/  
ende eerlijck dus langhe bewaert. En het is openbaer/  
dat ons Vaderlandt/ t'welcke duyfencmael zwaerlijcker  
dooz die Spaengnaerts is ghetyranniseert gheweest/ dā  
die Zwitfers opt waeren/ ende nu meulijck die moorde-  
rissche ende verraderissche ontrauwe vande Fransopsen  
bevonden hebbende/ veel meer cause/ oock veel beter be-  
quaemheyt ende ghelegghentheyt heeft/ om sulcke ofte een  
derghelijcke regeringhe aen te stellen/ dā die in Zwitser-  
landt opt daertoe ghehadt hebben.

Wat bequaemheyt ende ghelegghentheyt dat onse Ne-  
derlanden hebben/ om een sulcke syne regeringhe aen te  
stellen/ wat middelen ende sterckten dat daer oock zijn/  
dit hebbē Duc d'Alue/ Requellens/ Don Jan d'Autria/  
ende de Prince vā Parma/ dus langhe wel eruaren. Dat  
25 ij. onse



onse Lantflupden oock handen ende voeten hebben / betuyghen niet alleyn die Chronijcken / maer in Hollandt ende Zeelandt heefmen dat wel ghesien / ende men soude sulcker exempelen meer ghehadt hebben / hadtme ons volck willen inde wapenen oeffenen ende ghebruycken / ende niet veel lieuer byemden daertoe gheroepen / op dat onse inghesetenen haere sterckheyt en cracht niet weten / maer alijt die melckende koepe bliuen soude. Die van Antwerpen hebben (daer van Godt eeuwigh eere alleyn moet ghegheuen werden) mit der daet nieulijc wel bewesen / dat sy oock Mannen zijn / als het die noot heyschet / twelck andere oock desghelijcx wel doen souden / waert dat sy recht gheoeffent ende aengheboert / en daer in niet ghehindert ende belet en waere. Daerom mach hem de Auctheur des Dialogi, daer Ernestus en Immanuel tsamen sprekende ingheboert werden / wel schamen / daer hy alle inwoonders ons Vaderlants also verachtet / of sy alle dronckaerts / suppers ende ghierichaerts ware / ende datter niet een redelijck dapper Man en waere. Syne Lantlieden die Fransosen / sullē hem dat wederspel wel betuyghen. Het waere den seluen Auctheur beter / dat hy zijn tonghe ende penne (die hy dus langhe om ghelt verhuert iac vercocht heeft) beter ghebruyct hadde / maer hy sal zijn oordeel draghen.

Het waere nu dan eens tijt / dat wy niet meer mit byemde ooren ende ooghen saghen / en hoorden / en mit byemde handen ons beschermiden / maer dat wy selue ons ooren ende ooghen open deden / ende ons eyghen handen ende volck / tot onser verlossinghe ende bescherminghe / midts de Vaderlijcke hulpe Godts / oock eenmael ghebruyckten. Want wat manghelt ons / hebben wy niet also syne sterke Mannen / om dat Corcelet en die Spijse te draghen / ander om die Busse te ghebruycken / als andere Landen. Quertreffen onse Landen niet erbarene Zeevaerders / Mattelosen ende Bootsghesellen niet alle andere Landen / wy hebben veel te langhe die Raets-Heere ghe-



ghehoort/ die haeren raedt wt Marcionelli ghesoghē heb-  
bende/ ende alles mit vremde Crijchsvolck hebbē willen  
wtrichten/ op dat wy onse sterckheyt niet wetende/ ons  
tot op het been souden laten scheeren ende villen. Alle  
die nae tyrannie ghetrachtet hebben/ die hebben sulcke  
procedueren en manieren vā Crijch te voeren ghebruyt/  
maer die des Landts ende des volcks verlossinghe ende  
bypheyt ghesocht hebben/ die hebben den Inghelerten  
des Landts/ die wapenen inde handt ghegheuen/ want  
die connen alder best/ voor Wijs ende Kint/ Huys/ Hof/  
en goet/ iae voor haer eyghen lijf ende leuen stryden/ die  
de saecke selue aengaet/ beter dā die/ die om ghelcs wil-  
le/ wt vremde Landen daertoe moeten beroepen en ghe-  
huert werdē/ en daerom hen ooc als huerlinghē stellen.

Wy moeten oock bedencken/ dat wy nu niet langher  
die middelen hebben/ om sulcke Imposten/ Licenten/  
schattinghen ende ghiften/ die de schattinghen (welcke  
Duc d'Alue ons opghelept heeft/ al verre te bouen gaē)  
meer te gheuen/ ghemerckt dat die platte Landē/ die op  
deser yden des waters ligghē/ gantsch verwoestet zijn/  
ende dat die steden sonder neeringhe/ ende die Kentiers  
sonder Jaerlicksche Kentē in armoede zittende/ sulcke la-  
sten niet langher draghē connen. So zijn oock die Ghee-  
stelijke goederen/ daer mit men die aarme ghemeynte/  
niet allepne nu/ maer naemaels tot eenwighen tyde/ wel  
anders ende beter hadde connen verschoonen/ schier alle  
also ghesmolten/ datmen niet en weet/ waer die ghesto-  
uen ofte verbloghen zijn.

Daerom so wy ende onse naecommers/ niet willē bal-  
len in een grouwelijcker dienstbaerheyt/ dā die Mooren  
opt gheweest zijn/ so moeten wy ons slamen vereenighē  
ende verbinden/ ende ons seluen helpen/ mit die cleyne  
middelen/ die ons Godt/ noch ghelaten heeft. Wy heb-  
ben ons veel te langhe op die ghecroochte Rieten Egypti  
berlaten/ die ons/ so Elaias spreekt/ door de handē ghe-

23 iij.      boort



boort ende ghesteken hebbe. **W**t Hispanien en is gheen  
zekere versoeninghe/ noch wt **V**ancrijck/ gheene besten-  
dighe tranwe te verwachten. **E**nde hoe onse **N**ederlan-  
den mit vremde **G**ouverneurs vanden tijt af/ dat **V**an  
**M**argriete in **N**ederlandt gheregiert heeft/ ghebare zijn/  
hoe die vremde de beste officien ende staten/ en alsoo den  
rijckdom des **L**andts becommen/ ende die beste rijckste  
houwelijcken ghedaen hebben/ die mitgaders oock hae-  
ren kinderen ende naecommelinghe/ ons nu alle dit on-  
gheluck causeren ende toebzinghe/ dat weten sy wel/ die  
een weynich tot haren **J**aren ghecommen zijn/ en sulc-  
ke saecken gaede gheslaghen hebben.

**D**ies seggh' ick noch een-mael/ so wy van alle dese be-  
zwaeringhen/ **C**rijch ende ongheluck/ willen bezyt/ en  
eenmael verlost werden/ wy moeten ons slamen verbin-  
den/ ende **G**odt booz ooghen hebbende/ en hem van her-  
ten aenroepende/ een sulcke lydelijcke regieringhe/ wt de  
**A**ristocratie ende **D**emocratie slame ghevoeght/ aenstel-  
len ende ons seluen helpen/ ende mans herten aennemē/  
ofte anders/ wy/ ende onse naecommelinghe (so wy an-  
ders dat leuen noch ontdraghe connen) werden die ellen-  
dichste slauen blpuen/ die noyt ter werelt gheweest zijn.

**I**st dat wy nu zulckis doen/ also eenmael tot **V**trecht/  
tselue louelijck aenghevanghen was te besluyten/ ende  
oock int werck te rechten/ ende so wy daer nae by som-  
mighe **E**uangelischen **C**hurfursten/ **F**ursten/ **G**raue en  
byse **R**ijcksteden in **D**uytschlandt/ om hulpe/ bystandt/  
beschuttinghe/ bescherminghe/ ende verbontenissen oot-  
moedelijck aensoecken: het staet eyghentlijck te verhope  
ende te verwachtē/ dat wy sullen op ende aenghenomen  
zijn/ ende als byse **R**ijcksteden/ een pder **L**andt/ **S**tadt  
en plaetse (de bypheyt vande waere reyne **R**eligie/ en zijn  
oude **P**riuilegiē behoudende) onder de beschuttinghe der  
boozlepde **H**eerē zittē/ woonen en blpuen sullē. **W**ant  
al ist datter sommighe zijn/ die ter cause vander **R**eligie/  
ende



en vande Alliancien/ die sy met Hispanien ofte mit Fran-  
rijck hebbē/ mit ons gheē verbont noch vrientschap zul-  
len begheeren/ so zijnder nochtans vele andere/ die ons  
groot/ sterck ende machtich ghenoech wesen sullen/ om  
ons te handthauen ende te beschermē/ die sulcks vā her-  
ten begheeren sullen/ ouermidts dat sy wel zien en ver-  
staen/ dat sy ooc onderdruet werdē moetē/ ist dat wy/het  
sy vanden Spaengnaerden/oft vande Fransosen/ouer-  
welbicht ende in slaernie ghebracht werden. Nu zijn-  
der oock wel middelen/ dat wy by den voorseden/ mit  
behoorlijcke versekeringhe ende Caution, ghelt te weghe  
brijnghen connen/ daer mit wy ons/ wt dese reghewooz-  
dighe hooghste benaethept brijnghen/ ende mit Godes  
hulpe verlossen connen en sullen/ ist dat wy eerst een goe-  
de resolutie by ons seluen nemen/ ende tsamen staen/ als  
een eenigher Man/ ende niet langher/ als onghetbondene  
schichten en ppen van een ander verstroyt ligghen.

Maer so yemant hier teghē segghen woude/ dat wy  
vanden Duytschen Churfursten/ Fursten ende Rijckste-  
den/ gheen hulpe te verwachten hebben/ wt causen/ dat  
wy int Jaer 1578. op den dach tot Wormis/ daer die  
Ghedeputeerden der Churfursten/ Fursten/ Grauen en  
Rijcksteden tsamen ghecomen waeren/ ende wy haere  
bescherminghe begheert/ gheen troostelijcke antwoorde  
becommen hebben/ ende dat wy daerom/ nu noch veel  
wepnigher vercrpghen sullen: deser sal weten/ dat sulcks  
niet te verwonderen en is/ want het eerstelijck openbaer  
is/ dat sy/ die op dien tijt inden Raet van Staten/ die  
voornaemste warē/ sulcks noyt van hertē ghelocht noch  
ghemeynt hebbē/ daer om is dat niet meer dā eene schijn-  
handelinghe gheweest. Ten anderen/ soo heeftmen int  
Rijcke wel gheweten/ dat sommighe voornaem Heeren/  
mit den Hertogh van Alençon/ ter seluer tijt in hande-  
linghe ghestaen hebben/ ende dat daerom/ sulck soecken  
ende begheeren/ niet van herten ghemeynt was. Ende  
ten lesten/ so en waerē die Churfursten/ Furste/ Grauen  
ende



ende Rijcksteden/ bande saecke niet gheaduerteert/ eer sy  
haere Ghedeputeerden op den dach ghesonden hebben/  
die Ghedeputeerden/ hebben gheen beuel noch instructie  
ghehad/ om daer op te resoluerē/ maer moesten dat aen  
haer Querheeren refererē/ so dat behoorlijck is/ ende tot  
allen tyden oock int Nederlandt het ghebruyck is ghe-  
weest/ oftmē nu schoon dicwils het contrarie doet. Vouē  
dien/ so was ooc de meestendeel der Ghedeputeerdē/ der  
saecke contrarie en partye. Wat is dan te verwonderen/  
datmen mit eenmael op sulcke wyle slechtelijck te schic-  
ken/ niet vercreghē heeft/ de wyle men daer nae/ noyt ee-  
nighen Churfursten/ Fursten/ Heeren ofte Stadt eenen  
slechten Brief tot dien syne gheschreue heeft? Maer nu  
zijn het ander tyden/ vele Churfurstē/ Fursten en Stedē/  
hebben wt het ghene dat dese vijf Jaeren verlopen is/  
ende hem toeghedraghen heeft/ leeren kennen ende ver-  
staē/ dat die onderdruckinghe des Nederlandts/ dē Quer-  
landt oock tot merckelijckē schaden comt/ daerom so sy/  
also het ghehoort/ nu vriendelijck versocht ende ghebedē  
werden/ my en twijffelt niet/ of daer en sal eene sulcke ant-  
woorde vercreghen werden/ die onsen Vaderlanden ten  
goeden/ tot troost ende verlossinghe dienen sal/ daer door  
die aenslaghen der byanden/ seer gheturbeert/ ghezwa-  
ket/ iae eyndelijck tot niet sullen ghemaectt werdē. Wāt  
die meyninghe en is niet/ dat wy mit het gantsche Rijck/  
handelen willen/ maer mit den naestgheseten/ en mit den  
goethertichsten/ de welcke ons int ghetal ende in macht  
ghenoechsaem wesen sullē/ om mit der hulpe Gods sulchs  
als voorseyt is te vercryghen.

Wy hebben dit tot onser schadē langhe ghenoech ghe-  
hoort/ die in dese Landē een nieuwe/ doch ghelimitē-  
de Monarchie/ hebbē willen oprichten/ en bevondē dat-  
tet onmoghelijc/ ende daer beneffens ons hoogh schade-  
lijck is/ ouermits dat wy eenen Heere (hy sy wie hy wil)  
tot onsen Querheere aennemende/ den Coninck vā His-  
panien/ ende dat Hups van Oostenrijcke een eenwighe  
cause



cause gheuen van jalousie/ en volghents van eenē ghe-  
 duerighen Crijsch/ ende van daghelijsche verraderpen  
 en entreprinzen/ wanneer het schoon de nieuwe aenghe-  
 nomene Heere/ mit ons ende onsen Vaderlande/ gantsch  
 goet en ghetrouwelijc mepnde. Maer so het de nieuwe  
 aenghenomene Heere/ mit ons niet goet noch oprechte-  
 lijc en mepnt/zijn wy niet veel argher/ daer aen/ dan wy  
 opt te boopen waeren/ ghelijck het nu mit der Franso-  
 sischer verraderpe en moort ghebleke is? Die niet moet-  
 willichlijck blende zijn willen/ behoordē/ wt alle het ghe-  
 ne datter gheschiet ende ghevolght is/ vandē tijt af/ dat  
 wy mit den Hertogh vā Alençon/ tot Bordeaux ghe-  
 capituleert hebbē/ te merken/ die correspondentie/ ende  
 het goede verstant/ dat tusschē den Paus en den Coninc  
 van Hispanien en Franckrijck is/ den welckē Alençon  
 (volghende de goede instructie/ die hē syne Moeder van  
 de ioncheit aen ghegheue heeft) als een bequame instru-  
 ment dient/ om te volbringhen het selue/ dat sy in hare  
 bloetdurstighē raet besloten hebbē. Wie en soude sulcks  
 niet gypen en tastē/ wt sulcks als nieuwelicks tot Ant-  
 werpen gheschiet is/ en in so vele andere steden/ op eenē  
 dach/ en eene stonde bestekē ende aenghestelt was? Doch  
 die moetwillich in haere blintheit voortvaeren willē/ die  
 moeten verwachten ende draghē sulcks/ als den ghenen  
 tot allen tydē toeghecōmen is/ die alle ghetrouwe waer-  
 schouwvinghen en goeden raet veracht hebben/ namelijk  
 haren eyndelijcken onderganck.

En of schoon die Conijnc van Hispanien/ die Neder-  
 landen bypwillich/ eenen anderē Heere schenckē woude/  
 ende dat de selue mit veel eydtsweeren/ ons onse Priuile-  
 gien en bypheden te bewaren en te beschermen toeseyde/  
 noch en waren wy onder eenen sulcken Monarcha, niet  
 recht noch wel verlekert/ ouermidts dat wy daghelijsch  
 bebindē/ dat sulcks sonder schaemte en schande gheprac-  
 tiseert wert/ dat Lysander te segghē plach/ namelijk/ dat  
 men den kinderen mit poppen en kinderspel/ maer die  
 Mannē



Mannen mit eydtweeren bedrieghen moet/ ghelijck die  
Paus oock leert/ datmē den Ketters gheenē eydt te hou=  
den schuldich is/ ende Marciouelli laet oock den Princen  
toe haeren eydt te brenken/ so menichmael/ als sy dat tot  
onderhoudinghe haeres standts/ nuttelijck ende nootsae=  
kelijck bevinden.

Wy hebbē ooc te bedenckē/ wat die ghestadighe groo=  
te Hof-houdinghe der grooter Heeren costet/ en hoe vele  
lichter dattet ons vallen sal/ in tyden van noodē/ eenen  
Heeren voor eenē tijt/ tot eenen Welt-Quersten te onder=  
houden/ den welckē wy mit eeren afdanckē moghē/ als  
de tijt inde bestellinghe begrepe/ voorby is/ dan een eeu=  
wighe Hof-houdinghe (daer wt ghemeynelijc allerley on=  
ghereghelicheyt en boosheyt/ onder dat ghemeyne volck  
ontstaet) onderhoudē werdē can. Een byse Rijckstadt/  
als Straesburg/ Rozenburg/ Augspurg/ Francfort/ Lu=  
becke/ Bremen ofte andere derghelijcke/ connē veel lichter/  
eenen Fursten/ ofte Grauen/ inden noot/ eenen tijt lanck  
statelijc onderhouden en vereeren/ dan dat sy die eeuwi=  
ghe ende gheduerighe Hof-houdinghe/ onderhoudē sou=  
den. So sal het oock mit ons toegaen.

Maer so yemandt segghen woude/ dat dit al waer is/  
maer dat wy in desen teghenwoordighē standt des Vader=  
lants/ eenes Monarchen en grooten Potentaets van noo=  
den hebben/ dien wil ick braghē/ en bidden/ dat hy my seg=  
ghe/ wat hebben ons onse groote Potentaten dus langhe  
goets wtgherichtet? Is onse staet en conditie nu niet elen=  
der ende aermmer/ dā hy opt gheweest is? En eenen Poten=  
taet aen ghenomen hebbende/ hoe sullen wy des seluen als  
wy willen daernaer quijt werdē? Eenem sulckē machteighē  
Heere ouer ons verkiefende en stellende/ vallē wy niet we=  
derom in die inconuenienten en swaricheden/ daer van wy  
hier voer ghesprokē hebbē/ d'welcke doorwaer niet clepne/  
noch te verachtē zijn? Maer so wy ons so voorsept is/ ver=  
binden en vereenighē/ eerstelijc onder ons/ mit eenē eeuwi=  
ghen



ghen Bondt/daernae ooc ons mit die Churfurstē / Furstē/  
Grauen/Heerē en steden der Duytsche Nation, die der Re-  
ligie toegedaē / en onsen Vaderlande niet verre noch wijt  
ontferē/en door onse onderdruckinge gheinterresseert zijn/  
bereenighē/ so hebbē wy indē noot/ eenē sulckē Querheere  
als wy begheeren / ende als den noot cesseert ende ophout/  
connen wy desseluen mit eeren/ danck ende vriendschap  
wederom quijt ende ledich werden.

Dese middel ghebruyckende/ connē wy allē onsen by-  
anden in haren eyghenē Landē/ lichtelijc so veel te schaffen  
en te doen maken/ dat sy ons hier in dese Nederlanden wel  
sullen mit vrede laten. En dese bouen gheschreue regierin-  
ghe/en behoorde os Nederlanders niet nieu oft onbequaē  
te dencken/de wyle wy eerst/by eens menschē ghedencken/  
onder eenen Monarcha ofte Hooft ghecōmen zijn / ende dat  
noch tot op den dach van hedent / die marckteeckenē onser  
ouder bypheyt/ in het tsamē beroepē en beschryue der Sta-  
ten en Leiden bandē Landen/voorhandē sijn/en ghebruyct  
werdē. Daer en can ooc gheen beter forme van regieringe  
bedacht werden / dan dese is / ouermits/ dat hier door/ die  
Magistratē ghedwonghē werdē/om voorzichtig en wy-  
selijck/ mit bescheydenheyt te regierē/ anders werdē sy mit  
schandē afghesettet. Hier door werdē ooc die onderdanen  
veroorlaet en beweeght / om hare Querhedē lief te hebbē/  
te eeren / en ghehoorlaet te wese/de wyle sy gheē ander Quer-  
heyt en hebbē/dan euen/ die/ die sy selue vercopt en gehoor-  
laemheyt belooft en gheswooren hebben. Dese regieringhe  
is gheen opzwerfliche onordentlijcke Ataxia ofte confusie/ so  
die pluymstrijckers der Tyrannē / die te noemen pleghen/  
maer een rechte Isonomia, so die Griekē die noemē/dat is/  
een ghelijcheit des rechts/om dat in een sulcke regieringe/  
sonder verkeerde ionste ofte aensie der persoonē/ dat Recht  
ende die Justitie/ eenen peggelijcken ghelijckelijc mit ghe-  
deelt wert. En in allen byen Rijckstedē vā Duytschlant/  
is schier euen een sulcke forme en maniere vā regieringhe/  
daer nae wy ons wel reguleren connē/so veel als die Priuile-  
gien

C ij.

legien



legien en oude byphede / vā een peghelijc Landt en Stadt/  
dat lyde moghe / en connē doch dies niet teghēstaende / tla-  
men in een corpus vereenicht en verbondē zijnde / dē gemep-  
nen vbandt / die dē eenen ofte dē anderē beschadigē en aen-  
gypen woude / eendrachtelijc tot ghemeynē costē en lasten  
wederstaē / en dē aenghebochtenē Bondtghenootē ontsettē  
en verlossen / so dat ooc tot Utrecht bedacht en beslotē was.

Alengaende de Calumnia / en valsche beschuldighen der  
Tyannen / en haere pluymstrijckers / die daer voorgeuen  
dat alle die een sulcke regieringhe begheeren aen te richtē /  
vbanden zijn vandē Edeldom / en den seluē begheerē wt te  
roepen (welcke valsche beschuldighen / sommighe daertoe  
gheaposteert zijnde / door Arthois en Henegouwe / iae door  
het gantsche Landt / om die tyrannie te continuerē / wtghe-  
brydet en ghesaept hebbē / die is so onghegrondt / datse niet  
verantwoordens weert is. De Zwitsers hebbē die ghesla-  
ghen en wtgheroept / die haere vbanden en verraders ghe-  
weest zijn / die de Tyannē gheholpē en ghestercket hebbē /  
sonder aensien der persoonē / oft sy edel oft onedel / Gheeste-  
lijck oft Weerlijck / rijck oft aerm / Bozgher oft Boersman  
gheweest zijn / wie can hem daerin onrecht gheuen ? Waer  
ghelchiet eenen slacht / daer een peghelijc / sonder aensien  
der persoonē / synē vbandt niet en soeckt te slaen en te crenc-  
ken ? Daerō heeft dese calumnie gheenē grondt / ghemerct /  
dat die goede en byzome Edel-lieden aldaer / die het mit haer  
eyghen Vaderlandt ghetroutelijc ghehoudē hebben / niet  
allepne noch ter tijt daer in bypheyt / ende in het ghebryck  
van haere goederē wonen en leuen / maer ooc lief en weert  
zijn / en in hooghē eeren ghehoudē werdē. Zijn die te mis-  
pysen / die nieuwelijcks tot Antwerpē / sonder aensien van  
edelen ofte onedelē / die Fransosen gheslaghe hebben / die  
hen verclaert haddē / vbandē van Godes Woort / en vande  
bypheyt en welbaert der Stadt / iae moorders der Bozgherē  
van Vrouwen en Kinderē / en roouers van haere goederen  
dat sal gheen redelijck mensche segghē / want also de rechte  
warre Edel-lieden / die de daet mit dē name hebbē / niet en  
connē



connen in eenen Lande en Stadt te veel zijn/also der Edel-  
 lieden/die niet dā den bloote name hebbē/ en onder dē tytel  
 des Edeldoms/ niet anders dan tyrannie en roouerie soec-  
 ken/en connē in Landē en Stedē niet te wepnich zijn. Ja  
 woude Godt datter int Landt niet eenen sulckē waere/ het  
 en soude niet te argher toegaen/ en alle die recht ende inder  
 waerheyt edel zijn/ sullē tselue mit my wenschē en beghee-  
 ren. Woude Godt dat alle ghenoeemde Edelē/die dē Prin-  
 ce van Parma helpen/ Gods Woort ende des Vaderlants  
 bypheynt onderdruckē/ euen dē loon ontfanghē haddē/ dien  
 de Edele verraders en moorders tot Antwerpē ontfanghē  
 hebben. De rechte Edelē zijn dobbel eere weerd/ en wou-  
 de Godt/dat wy in ons Vaderlant sulcker Edel-liedē thie-  
 ne voor eenen hadden/so stonden onse zaken veel beter/dan  
 sy nu staen. En alsomen vandē Edeldom mit onderscheet  
 spreken moet/euen so moermē oock van Aduocaten ende  
 Rechtsgheleerdē/ mit onderscheet handelen/die vrome/die  
 dat recht verclaren en voorstaen/ en gheē quade cause soec-  
 ken goet te maken/maer den Tyrannen wederspreken/die  
 zijn te pypsen/ghelijc Papinianus dede/de welcke tot dē Ke-  
 ser Caracalla sprack/die daer gheboort ende beual/dat hy die  
 moort zijns broeders Geta (so Herodianus schrijft) by den  
 Kaet te Rome verbloemē en ontschuldighē soude: Parrici-  
 dium (sprack Papinianus) dat is een sulcke broeders moort/  
 werdt lichtelijcker beganghen/ dan ontschuldighet/ofte  
 verandt woort/ ende woude sulcks niet doen/daerom hem  
 oock Caracalla heeft laten ombrijnghen.

Alsulcke Rechtgheleerde/ die dat Recht ghetrauwelijc  
 verclarē/wtlegghē en voorstaē/en dat onrecht straffen/zijn  
 in een wel aenghestelde Republicque/niet alleenelijck goet  
 ende profytelijc/maer ooc om zware twistighe en donckere  
 differenten ende misverstanden te slechten ende te eyndi-  
 ghen/ hooghelijck van nooden.

So nu eene sulcke forme van regteringhe aenghestelt  
 wierde/ghelijck voor verhaelt is/so waere te verhopē/ dat

C. liij.      die



die Prouincien/die door de ambitie van sommighē/bā onghealieneert en afghescheyden zijn (so sy die oorsaecken te kennen gheuen/ in eenen Brief ghedruckt den 11. Augusti 1578.) hen wederom mochten mit ons verbinden en vereenighen/ om den ghemeynen vbandt wederstandt te doene/ en de bypheyte des ghemeynen Vaderlandts te beschermen en voer te staen/ te meer dat sy dus langhe wel bebonden hebbē/ dat sy oock in die hooghste aermoede ghecomen zijn/ ende noch meer comen moeten/ wt dien dat sy volghende die particuliere passien ende affectien van sommighē/ dē Spaengnaert so diepe hebbē laten in-nestelen. Sy hebbē ooc by sommighe exempelē wel gheleert/ wat sy bandē Spaengnaerden te verwachten hebbē/ so sy wederom de ouerhandt cryghen/ ende meesters des Landts werden. En al ist/ dat het exercitie bande waere Religie/ noch ter tijt in die ghealieneerde Prouincien niet bequaemelijck can ingheboert werden/ so verre sy alleyn de bypheyte der consciencien toelaten willen/ ende dulden/ dat de ghene die anders ende beter gheboelen/ mit haere goede ghelegghentheyt/ met Lijf ende goet elders vertrecken moghen/ so conde men mit hen wel een Verbondt en Bozgherlijcke vereeninghe oprichtē/ ende dat mit goeder consciencie/ tot des ghemeynen Vaderlandts bescherminghe/ verwachtede also/ dat hen Godt die ooghe sal openen/ ende hem die kennisse zijns Woordts gheuen/ so hy anderē Prouincien ghenadelijck ghedaen heeft. Want euen dit selue gheschiet noch daghelicks in Duytschlandt/ ende in Zwitserlandt/ ende die voorsepde Prouincien/ hebben euen het selue/ inde Pacificatie tot Ghendt opgherichtet/ bewillighet/ daerom sy int ghene dat voorsept is/ hen niet te bezwaren hebben.

Ich verhope dat vele verstaadighe ghetrautwe Liefhebbers des Vaderlandts/ dit aduys niet quaet noch onbequaem sullen vindē/ alleynlijck twee soorten van mensche sullen die teghenspreken/ die eerste zijn/ die/ welcke voorsemaels/ door die tyrannie des Paus ende door die Spaensche Inquisitie/ ouer lijf ende goet macht ghehadt hebben/



ben / ende also tot hoogheyt ende rijckdom ghecommen  
waren / die hen nu wat vernedert vinden. Maer ick ho-  
pe dat de clachten der sulcker / weynich ghehoors hebben  
sullen. Die ander zijn / alle die / welke hen als Patriot-  
ten ende als de Religie toegheedaen zijnde / aen stellende / de  
beste officien ende staten vercreghen hebben / en die Finan-  
tien also regieren / dat sy wt aeremoede in corten Jaren tot  
grooten rijckdommen ghecommen zijn / daer van sy ont-  
settet wesen moeten / soude het anders mit den Vaderlan-  
de recht toegaen. Maer sullen wy so blinde ende onber-  
standich zijn en alrijt blyuen / dat wy om ettelijcke pluym-  
strijckers der grooten / die anders niet / dan haer eyghen  
proffijt soecken / ende hem mit ghemeyne ghelt rijck ende  
machtich make / somen ziet / ons ende onse naercommers /  
inder eeuwichheit laten verderuen? Het en sal mit de Va-  
derlande niet eer recht noch wel gaen / niet voor dat wy / so  
bouen gheseyt is / ons eyghen volck buycken / ende die tot  
Crijchlieden make / ende dat een pedere Stadt en Landt /  
zijn eyghen ghelddt ontfanghe / ende oock wtghene ende  
betale / also een peggelich sal ghetareert zijn / aen sulc Crijch-  
volck / ende tot sulcken vlagie ende ghebuycke / als eenen  
pegghelijcken by ghemeyne aduylse sal veroordonneert wer-  
den. Maer om dat ick achte dat een peggelijck dit wel  
merckt ende verstaet / so houde ick onnoodich / hier vā bree-  
der vermaen te doen.

Men conde noch veel meer schryuen / om desen raet en  
meeninghe te amplificeren / te verclaeren ende te beuesti-  
ghen / maer ick houde / dat wt sulcks als voorseyt is / alle  
ghetrouwde Liefhebbers vā Gods Woordt / ende des Va-  
derlants welbaert ende bypheit / wel mercken en verstaen  
connen / datter tot desen tyde / om die causen boozen ver-  
haelt / gheen beter / bestendigher noch bequaemer forme vā  
regieringhe / ghevonden werden can / om ons Vaderlant /  
wt desen iammerlijcken staet / tot breden ende tot den ou-  
den welstandt te bringhe / dan die voorseyde vermenghde  
regieringhe / wt die Aristocratie ende Democratie samen  
ghe-



gheboeght/ ghelijc die inden byge Rijckstede/ en in Zwit-  
serlandt aenghestelt is/ soo oock de selue tot Utrecht be-  
worpen was/ iae so die van ouden tyden/ in die Neder-  
landen altijt gheweest is/ also die ouerghebleue reliquien  
bande conuocatie der Staten/ ende dat hoozen/ vanden  
adupsen der byge Raeden/ Wijckmeesters/ Dekenien/  
Gulden/ Schutterpen ende Neeringhen/ dat wel bewop-  
sen. Soo wy daer en bouen/ die alliancie soecken mit  
sommighen byomen Duytschen Churfursten/ Fursten/  
Grauen/ Heeren ende byge Rijcksteden/ die wy ontwop-  
selijck door Godts ghenade binden ende vercrpghē sul-  
len/ soo staet te verhopē/ dat Godt ons de ghenade be-  
wopen en thoonen sal/ die ons vā nooden is/ om het Landt/  
van so veel byanden te verlossen/ die ghealieneerde weder-  
om tot der eenicheyt te beweghen/ ende also dat Landt tot  
synen ouden welstandt te byjnghe/ tot Godes eere/ ver-  
boorderinghe zijns salichmakende Woordts/ ende onse  
ende onser naercommelinghen eeuwighe ende tydelijcke  
welbaert.

Syrach. Cap. 32.

Een vernuftich Man en veracht goeden raet niet/ maer  
een wildt ende hoouerbich mensche/ en vreeft hem  
niet wat hy oock ghedaen heeft. Doet niet sonder  
raedt/ so en berouwet v niet nae der daet.





20